

11
1774
6



遠上寒山一徑青神仙眷屬草堂靈悉曇經典歸何處憔悴

中郎曙後星

趙宦光凡夫 子均靈均

蘇州府志寒山別業在支硎之南高士趙宦光葬其父於此閒自闢巖壑如仙源異境與其妻陸卿子偕隱焉構小宛堂藏書其中 馮時可趙凡夫先生傳凡夫姓趙氏名宦光故宋王孫神明之胄父含玄子諱廷梧配陸碩人子傳先生諱師道所自出 錢謙益趙靈均傳君諱均字靈均父宦光靈均娶於文諱淑字端容其高祖父爲衡山公父爲貢士從簡端容性明慧所見幽花異卉小蟲怪蝶信筆渲染皆能摹寫得千種名曰寒山草木昆蟲狀靈均玩其妻施丹調粉日晏忘食欣欣如也崇禎甲戌端容卒年



1774
6

四十有三又七年庚辰六月靈均亦卒年五十無子以從弟之子錕為後一女曰昭歸平湖馬氏余讀李易安金石錄序嘆其伉儷之賢才藻之美而惜其不終如靈均夫婦其才可以耦其窮亦可以老而天不與之壽且斬其後何邪先趙氏之金石今獨其目在耳小宛之堂芸籤縹帶亦如所謂連艫連舳散為雲煙者有無聚散不可重為歎邪
珊瑚網崇禎癸未重九寒山趙子惠攜其先凡夫所遺物欲售余得觀衡山手錄甫田集李北海墨蹟及古澄泥硯楊萱彩描漆囊魚耳宣鑪子惠近作云盛夏非關逼歲除凱風偏不借吹噓款題扶風馬昭從夫姓也詩與字不下其先陸卿子至寫生逼真其母氏文淑也惜不免去婦

歎耳噫佳人命薄自古為然矣 天祿琳琅梁溪漫志有吳郡趙宦光家諸子印又姓氏急就篇有寒山趙宦光家諸子趙凡夫讀殘書二朱記 持靜齋書目書法鈎元四卷元刊本眉端丹黃皆趙宦光手蹟後有草篆書萬曆壬子仲春二日胡蝶寢閣云云有吳郡趙宦光家經籍寒山梁鴻墓下凡夫諸印昌熾案寒山志凡夫有廬曰尺宅署曰遠上寒山石徑斜白雲深處有人家其內院曰蝴蝶寢寢前佛閣可藏三車經籍曰悉曇章閣悉曇章者華梵互稱五天大藏之祖萬國文字皆從流出也又案式古堂書畫攷趙端容文石良薑圖有寒山蘭閨畫史喬葉貞蕤端操有從幽閑有容三朱記

陂頭老杏酒旗招岌岌高冠帶欲飄東湖盟言留息壤西亭
著錄盪寒潮 張民表林宗

周亮工張林宗先生傳先生諱民表字法幢一字塞庵大
梁之中牟人世居晶澤里宮保孟男之子也家藏書數萬
卷皆手自點定自稱旃然漁隱又號蕊淵道人 明詩綜
小傳林宗一字武仲有原圃塞庵詩集 列朝詩傳林宗
萬曆辛卯舉於鄉任俠好客時蕩舟於郭外之南陂頂高
冠飄二帶帶上繡東坡半升偉漉淵明酒三寸纔容子夏
冠之句乘敗車無頂幔一老特牽之朗吟車中每日醉陂
頭老杏下門人子弟扶掖而歸崇禎壬午寇圍大梁守死
不去水灌城而歿與祥符王損仲友善余之交於林宗以

損仲也宗尉西亭多藏書余屬林宗購其書目天啓中余
以奄禍里居客從大梁來林宗繕寫閒關寓余酒閒片言
皎如信誓生平爲可知矣

蘇門學髓開百樓火傳束緼徧中州問津欲涉富春否一葉
印須太乙舟 耿震國 齋孫應蛟

陳用光太乙舟文集河南耿氏富春軒藏書目錄序富春
軒者耿徵君震國與其兄華國讀書之齋名也耿氏居襄
城自奉政君顯以學行仕宦著於明者數世崇禎末富春
君偕二子殉難及我 朝而以文學稱者相接也富春君
嘗購書金陵合奉政所積得三萬五百七十卷傳至訓導
君應蛟而目錄遂失又五世孫迪吉乃就其父孝友君所

著書并先世所藏重加編目又備著孝友君所手鈔及累世自著書目附於後仍繫之富春軒者從其朔也子興宗以示余余謂耿氏後能哀集遺書兢兢守之惟恐失墜富春君游高忠憲黃石齋之門而百樓先生爲孫徵君奇逢弟子雖籍西平別於襄城然固興宗五世從祖也孫徵君隱居伊洛實開潛庵之學余觀耿氏自著書中有中州道學編孝友君手鈔書有蘇門大社譜意其所述者孫氏之學乎 國朝先正事略耿先生名介字介石號逸庵河南登封人順治八年進士由檢討出爲福建巡海道康熙元年轉江西河東道因裁缺改直隸大名道憂歸不復出詣蘇門受業於孫徵君篤志躬行倡明絕學所著有理學正

經性理要旨中州道學編孝經易知敬恕堂存稿天祿琳琅續編文心雕龍元刊本有耿嘉祚印字會侯耿會侯鑿定書畫之章三朱記

十指如椎凍不信嚴霜初下寫書頻可知石鼎松聲裏桃葉攤書未是真 謝肇淛在杭

明詩綜小傳謝肇淛字在杭長樂人萬曆壬辰進士除湖州推官移東昌遷南京刑部主事調兵部轉工部郎中出爲雲南參政升廣西按察使歷左布政使有小草堂集漁洋居易錄宋楊大年武夷新集二十卷閩謝在杭寫本又古靈集二十卷宋陳襄著亦謝氏寫本 又宋謝竹友集謝方伯在杭跋云時方沍寒京師傭書甚貴需銓京

邸資用不贍乃手自鈔寫每清霜呵凍十指如槌幾二十日始竣萬曆己酉十二月二十四日 杭世駿竹友集跋
在杭收藏宋人集頗富近多散失惟此係其手書子孫裝界成冊平湖陸編修次友典閩試鈔得之 榕城詩話謝在杭小影予得見於鼇峯坊薛士玉家豐頤隆準粹容光悅姬人桃葉就其所執之卷而舒之流觀眄睐翩若燕翔童子煮茶石鼎沸聲與松籟互答曾鯨所寫也 又云在杭小草齋游燕下菰居東巒江諸集而外有五雜俎文海披沙西吳枝乘滇略百粵風土記支提山志長溪瑣語辭士玉悉以贈予辭妻其元孫故能道其家世今皆微落版亦散失矣手鈔文集及所輯郡國職林諸考尚在士玉家

白馬西來十二部青牛東去五千言還當禮失求諸野舍衛

空桐例可援

曹學佺能始

馬恭敏森

陳暹

四庫提要易經通論十二卷明曹學佺撰學佺字能始侯官人萬曆乙未進士官至四川按察使後爲朱聿鍵禮部尚書聿鍵敗自殺昌熾案能始亦號石倉 明詩紀事曹學佺字能始嘗謂二氏有藏吾儒無藏欲修儒藏與之鼎立將擷四庫之書十有餘年而未能卒業也 筆精吾鄉前輩藏書富者馬恭敏公森陳方伯公暹馬公季子能讀能守陳公後昆寢微則散如雲煙矣又林方伯公懋和王太史公應鐘亦喜聚書捐館未幾書盡亡失四公之書咸有朱黃批點句讀余間得之不啻拱璧也予友鄧參知原

岳謝方伯肇淞曹觀察學佺皆有書嗜鄧則裝演齊整觸
手如新謝則銳意搜羅不施批點曹則丹鉛滿卷枕籍沈
酣三君各自有癖然多得祕本則三君又不能窺予藩籬
也

武夷神君不可見幔亭仙樂奏雲匏欲尋三島人間世無恙
鰲峯汗竹巢

徐勣惟起

列朝詩傳徐舉人燧字惟和布衣勣字惟起又字興公閩
縣人永甯令梈之子也兄弟皆擅才名興公萬曆閒與曹
能始狎主閩中詞盟後進皆稱興公詩派家多藏書著筆
精榕陰新檢崇禎己卯偕其子訪余山中約以暇日互搜
所藏書討求放失遭時喪亂興公能始俱謝世而余頽然

老無志於斯文矣興公之子延壽能讀父書林茂之云劫
灰後興公鰲峯藏書尙無恙也 漁洋詩話徐延壽字存
永徐興公之子也家鰲峯藏書與曹能始謝在杭埒亂後
並田園盡失之 明詩綜南損齋評云興公所居鰲峯麓
客從竹閒入環堵蕭然而牙籤四圍縹緗之富卿侯不能
敵也 靜志居詩話嚴儀卿論詩謂詩有別才非關學也
其言似是而實非興公藏書甚富予嘗見其遺籍大半點
墨施鉛或題其端或跋其尾好學若是故其詩典雅清穩
與惟和足稱二難今有稱詩者問以七略四部茫然如墮
雲霧顧好坐壇坫說詩其亦不自量矣 紅雨樓家藏書
目序予少也賤性喜博覽嘗取父書讀之覺津津有味既

長稍知訪輯然室如懸磬力不能舉羣有也會壬辰乙未
辛丑三爲吳越之游庚子又有書林之役迺撮其要者購
之因其未備者補之更有罕覩難得之書或卽類以求或
因人而乞或有朋舊見遺或借故家鈔錄積之十年合先
君子先伯兄所儲可盈五萬三千餘卷存之小樓堆牀充
棟頗有甲乙次第鉛槧暇日遂做鄭氏藝文略馬氏經籍
考之例爲書目四卷萬曆壬寅初秋三山徐燠興公書
又藏書屋銘少弄詞章遇書輒喜家乏良田但存經史先
人手澤連篇累紙珍惜裝潢不忍殘毀補缺拾遺坊售肆
市五典三墳六經諸子詩詞集說總兼樂府稗官咸備藏
蓄匪稱汗牛攷核頗精亥豕雖破萬卷之有餘不博人聞

之青紫茗椀香鑪明窗淨几開卷朗吟古人在此名士見
而歎嘉俗夫聞而竊鄙淫嗜生應不休癡癖死而後已此
樂何假南面百城豈曰誇多而門靡者也 又題兒陸書
軒菲飲食惡衣服減自奉買書讀積二年堆滿屋手有校
編有目無牙籤無玉軸置小齋名汗竹博非廚記非麓將
老矣竟不熟青箱業教兒陸繼書香爾當勸 又筆精一
則云余嘗謂人生之樂莫過閉戶讀書得一俯書識一奇
字遇一異事見一佳句不覺踴躍雖絲竹滿前綺羅盈目
不足喻其快也六一公有云至哉天下樂終日在几案余
友陳履吉云居常無事飽暖讀古人書卽人閒三島皆旨
哉言也 函宋樓藏書志晏子春秋八卷 元刊徐幔亭舊

藏末題萬曆戊戌中秋購於閩門肆中徐燧識 又檜亭
稿九卷元刊本面籤徐興公手書丁檜亭集徐氏汗竹巢
珍藏本元版十四字 又丁鶴年詩集三卷興公書丁鶴
年集徐氏汗竹巢珍藏本元版十四字

親知乾沒童駮棄徑寸元珠竟陸沈知與離木同拭皆目光
不到九淵深 姚士粦叔祥 呂兆禧錫侯

嘉興府志海鹽姚士粦字叔祥與胡震亨同學以奧博相
尚蒐羅秦漢以來遺文撰祕冊彙函跋尾各爲攷據具有
原委馮夢禎爲南祭酒校刊南北諸史多出其手有集四
卷呂兆禧字錫侯年十二能文章買書萬餘卷與士粦繙
誦矻矻丙夜不休早卒 叔祥尚白齋祕笈序吾郡未嘗

無藏書家卒無有以藏書聞者蓋知以祕惜爲藏不知以
傳布同好爲藏耳何者祕惜則箱橐中有不可知之秦劫
傳布則毫楮閒有遞相傳之神理此傳不傳之分不可不
察者然所謂不知傳布之說有四大抵先正立言有一時
怒而百世與者則子孫爲門戶計而不敢傳鬪奇炫博樂
於我知人不知則寶祕自好而不肯傳卷軸相假無復補
壞刊謬而獨踴還癡一諺則慮借鈔而不樂傳舊刻精整
或手書妍妙則懼翻摹致損而不忍傳一旦三災橫起流
爛滅沒余未暇遠引卽身所知見如吳伯度自言有虞春
秋余馳往索看則云誤矣遂不信有此頃見趙玄度言方
向楚中寄鈔則此書固自有也後聞馮太史姻家呂氏有

盛弘之荊州記便乞太史尋求而竟成烏有此二書尙屬
有無之際若吾友呂錫侯有靖康私記天興墨淚以物故
而不可再見李玄白有尙書大傳爲項逸之所借亾朱茂
正有尸子爲親知轉匿郁伯承有弇州別錄見竊於偷者
沈汝納有楊泉物理論漫棄於幼齡若此諸書政猶重寶
脫手墜入深淵無復得理惟項于王家有子夏易傳若干
卷吳公甫家有宋刻御覽若干卷沈汝納有十六國春秋
百二十卷儻能刻布亦同好一大快也此刻友人沈天生
及其弟水部白生手校剞劂可謂以傳布爲藏真能藏書
者矣昌熾案此書題秀水沈德先沈孚先同校當是二沈
之名 漁洋居易錄萬曆閒學士多撰僞書以欺世今類

書中所刻唐韓鄂歲華紀麗乃海鹽胡震亨孝轅所造於
陵子其友姚士粦所作也姚有後梁春秋如干卷惜未見
別風淮雨皆刊落墨黠朱明出劫灰得見袞師洵無匹慨然

發篋爲南雷

胡震亨孝轅

嘉興府志胡震亨字孝轅爲諸生卽以經濟自負萬曆丁
酉舉於鄉知合肥縣崇禎季年薦補定州知州擢員外郎
乞歸藏書萬卷日夕探討凡祕冊僻典魯魚漫漶者無不
補綴揚摧所著有唐音統籤 帶經堂詩話張宗柎附識
云吾鄉前輩在明神廟時推孝轅先生爲博雅第一儲藏
古籍與鄭端簡公埒遺編流傳印記宛然愚少時尙及觀
其一二今盡散入雲煙過眼錄中矣 又云先生集名赤

城山人稟 兩浙輶軒錄補遺胡夏客字宣子一字鮮知
海鹽人著谷水集俞寶華曰宣子明職方郎中震亨子少
年以諸生貢成均鼎革後隱居不仕 黃宗羲天一閣藏
書記海鹽胡孝轅考索精詳意其家必有藏書訪其子令
修慨然發其故篋亦有宋元集十餘種然皆余所見者孝
轅筆記稱引姚牧庵集令修亦言有其書一時索之不能
即得餘書則多殘本矣 南雷詩厯謝胡令修借孝轅先
生藏書詩聞說匡牀楊子居何期得見昔人書塵封蠹走
精神在墨豔朱明歲月除寰海被兵方賤士傳家有集勝
垂魚一瓿還借我無有慚愧此來幸不虛

巢許於陵留一線宋元明季閱三朝因家因地因人代文字

經綸附鄭樵

陳良卿

陸元厚

紫桃軒雜綴陳良卿性嗜異書年踰立即釋儒服謝學使
者隱沙水竹榭之間與吟翁野衲相往還遇有奇書隱牒
不惜破產購之江南故家遺帙搜抉殆徧余雖寡陋亦往
往漸其餘潤一日寄示余月泉吟社一編皆故宋遺老以
此耗磨雄心而煦濡慰藉良非淺者若良卿當盛明之世
英茂之年輒自斂藏恣其探奇索祕翔泳無羈之性抑何
高也固知巢許於陵一線根脈千古原未嘗斷 又陸元
厚家貧爲童子師性方嚴行止舉舉里中屠沽兒不敢狎
視公卿折節交之者僅一報謁不數往也喜蓄異書學奉
多爲書盡余嘗得其周禮國策離騷王子年拾遺記諸書

皆精本元厚書摹急就篇婉逸有態畫工草蟲不多爲人
作

宣綾包角藏經箋不抵當時裝訂錢憶否曠亭朱榻畔牙籤
風過一鏗然 祁承燦爾光 子忠敏彪佳

明詩綜小傳祁承燦字爾光紹興山陰人萬曆甲辰進士
歷江西右叅政有澹生堂集又彪佳字幼文天啓壬戌進
士巡撫應天都御史謝病歸乙酉閏月投園池死又駿佳
字季超豸佳字止祥熊佳字文載昌熾案皆忠敏弟 全
祖望祁六公子墓碣銘公子諱班孫字奕喜小字季郎忠
敏弟二子也其兄理孫字奕慶以大功兄弟次其行故世
皆呼曰祁五祁六兩公子昌熾案暴書亭集有題柯山寺

壁詩借游者祁理孫奕慶班孫奕喜敷孫奕儀誠孫奕明
奕儀奕明次於班孫之下當爲其弟奕明爲熊佳子竹垞
又有訪祁七明府熊佳留題公子誠孫詩可證也又有祁
鴻孫字奕遠忠敏兄子明詩綜亦采其詩 全祖望曠亭
記忠敏尊人少參夷度先生治曠園於梅里有淡生堂其
藏書之庫也有曠亭則游息之所也有東書堂其讀書之
所也夷度先生精於汲古其所鈔書世人多未見校勘精
核紙墨潔淨忠敏亦喜聚書嘗以朱紅小榻數十張頓放
縹碧諸函牙籤如玉風過有聲鏗然其所聚則不若夷度
先生之精忠敏殉難江南塵起幾二十年曠園之盛自此
衰歇今且陵夷殆盡書卷無一存者并池榭皆爲灌莽甚

可感也 馬瑗聞過齋集跋淡生堂儲經籍銘識款印將
爲子孫世珍百年之間散落人手近人有詩云宣綾包角
藏經箋不抵當時裝訂錢 靜志居詩話參政藏書將亂
其家悉載至雲門山寺惟遺元明來傳奇多至八百餘部
而葉兒樂府不與焉子猶及見之其手錄羣書月八冊今
存古林曹氏寺中所儲已盡流轉於姚江禦兒鄉矣 其
藏書印曰山陰祁氏藏書之章曰子孫永珍曰曠翁手識
曠翁夷度先生自號也又有藏書銘一印其文曰澹生堂
中儲經籍主人手校無朝夕讀之欣然忘飲食典衣市書
恒不給後人但念阿翁癖子孫益之守弗失夷度先生又
撰澹生堂藏書約以示子孫分子目四曰讀書訓曰聚書

訓曰購書訓曰鑒書訓刻入知不足齋叢書其約簡明足
爲藏書者法今錄其略曰今與爾輩約及吾之身則月益
之及爾輩之身則歲益之子孫能讀者則以一人盡居之
不能讀者則以眾人遞守之入架者不復出蠹齧者必速
補子孫取讀者就堂檢閱竟卽入架不得入私室親友
借觀者有副本則以應無副本則以辭正本不得出密園
外書目視所益多寡大較近以五年遠以十年一編次勿
分析勿覆瓿勿歸商賈手如此而已

細柳旌旗乍渡江將星黯澹落軍幢亂書臺石人如蟻不用
飛梁駕急瀧 潘曾紘昭度

吳興藏書錄後林潘氏書目下引湖錄潘曾紘字昭度烏

程人萬曆丙辰進士崇禎七年巡撫南贛九年羽書徵天下勤王曾紘提兵入衛獨先諸道渡江以勞成疾卒于軍賜祭葬 又云中丞公曾紘有意汲古廣儲縹緗視學中州羅致更夥鼎革時遭劫土兵至以書於溪中疊橋爲渡以搬運什物書之受厄至此書目已不復存 黃宗羲天一閣藏書記語溪呂及父吳興潘氏壻也言昭度欲改宋史網羅宋室野史甚富緘固十餘麓在家約余往觀先以所改麻志見示未幾而及父死矣此願未遂不知至今如故否也 閔元衢貴耳集跋潘昭度中丞嘗語余曰古人恐無表見而著書使不傳何假於著吾輩愛書擁而不使之傳亦豈真愛今而後宜以郡之藏書而不一借者爲戒

南渡遺文愴劫灰葭川手眼出東萊黃巾亦爲康成屈法宋

樓前萬騎回

沈嗣選仁舉

錢泰吉記沈氏嗣選南宋文鑑目嘉定張雲章漢瞻嘗輯南宋文鑑未脫橐王西莊光祿續成之乾隆甲午舉人海甯蔣顯謨字奏平亦有南宋文鑑然莫先於吾鄉先哲沈果庵之書也果庵字仁舉名嗣選嘉興貢生乙酉奉母避兵葭川羣盜知爲老孝子戒勿犯所著有儉娛堂集卒年七十六私謚孝貞 又南宋文鑑序目跋果庵先生當兵燹之際破產聚書有法宋樓書目四卷

細嚼梅花讀紫騮短歌當哭酒澆愁隱湖高閣今何有翠墨題詩到古膠

王咸與公

愛日精廬藏書志郭茂倩樂府王氏手識曰己卯四月十
八日坐寶月堂校始讀梅花曲令人幽冷繼續紫騮馬令
人雄騁及後輓歌對酒諸作又不覺志念俱消歛歎泣數
行下也長洲王與公識又曰己卯八月二十五日坐池上
閱竟衰年讀書但可量力而止兩日頗費翻閱覺頭涔涔
然作痛也長洲王與公 瞿中溶古泉山館集近得王與
公咸爲毛子晉所畫汲古閣圖上有五古一首因次其韻
虞山有書閣可望不可躋鷺溪尺幅絹珍逾鄴中綈裝潢
重什襲擬乞羣賢題更惜畫師名志乘無從稽琳琅散已
久巍基沒荒畦惟餘與公畫猶照太乙藜斯閣傳斯圖壽
與天乙齊

虞初九百有新說更演酉陽支諾臬家近太倉嘗一粟侏儒
飽死笑高高 鈕石溪

居易錄唐王保定摭言足本凡十五卷宋嘉定中柯山鄭
昉刻今會稽商氏刻僅十之一耳商刻稗海多得之浙東
鈕石溪家 黃宗羲天一閣藏書記古今書籍之厄不可
勝計以余所見言之越中藏書之家鈕石溪世學樓其著
也余見其小說家目錄亦數百種商氏之稗海皆從彼借
刻崇禎庚午閒其書初散余僅從故書鋪得十餘部而已
昌熾案人海記數藏書之厄亦及會稽鈕氏萬卷樓 天
祿琳琅漢書有會稽鈕氏世學樓圖籍印

蓮蕊自開常見佛桑田已變不言官一編中有遺臣淚歲月

圖章子細看

黃翼聖子羽

錢謙益黃子羽墓志銘子羽姓黃氏名翼聖子羽其字也世家常熟之塗松里弘治中割隸太倉萬曆己丑進士參政陝西諱元勳者其考也崇禎中以諸生應聘起家蜀新都知縣升安吉州知州致政以歸者其歷官也卒於己亥十月八日春秋六十有四其所享年也瑜子也侃孫也曇曾孫也 又蓮蕊居士傳子羽服官州邑晚而削迹息心築蓮蕊樓精修香光之業遂自號蓮蕊居士云性好古銅磁器及宋雕古書按訪把玩如美人好友屬有檀度事輒隨手散去其在蜀過鄭縣榻王稚子闕數紙歸而摩挲移日曰嘉魚官錦盡在此矣 又蓮蕊樓記子羽聞人心內

瓣正八和合爲蓮華心華自然開自見佛又此花含蕊寶池視行人勤惰以爲敷萎顏其室曰蓮蕊所以志也 讀書敏求記建康實錄黃子羽藏嘉祐年間鏤本吾猶及見之此則子羽家小胥所鈔也 百宋一廬賦參寥歸攝六之物注云參寥子詩集十二卷驗其收藏最先爲蓮鬚閣舊物有黃子羽讀書記小印也 鐵琴銅劍樓書目林和靖詩太倉黃攝六藏本有跋云余購之於武林徐門子鋪中後歸趙靈均靈均身後藏書盡散此冊獨存戊子夏趙昭携過涇上因復留之如異鄉之見故人也攝六黃翼卷首有有明黃翼收藏圖朱記昌熾案戊子爲順治六年子羽國變後杜門不出此跋僅題戊子而無紀元圖記冠以

有明二字蓋猶有故國故君之思焉

律論流通到羅什家錢雕印過毋昭祇因玉蟹泉香冽滿架

新材煑石鈔毛晉子晉
孫綏萬嘉年 于襄華伯 表奏叔 辰斧季

錢謙益隱湖毛君墓志銘毛子晉初名鳳苞晚更名晉世居虞山東湖父清孝弟力田爲鄉三老子晉通明好古強記博覽壯從余游益深知學問之指意經史全書勘讎流布毛氏之書走天下生五子襄襄表展襄表皆先卒晉生於己亥歲正月五日卒於己亥歲之七月二十七日年六十有一昌熾案晉又號潛在碩宋樓藏書志薛許昌詩集有毛子九讀書記鳳苞諸印子九當亦其號也襄字華伯號質庵表字奏叔號正庵辰字斧季生於崇禎十三年

六月二十六日余曾見龔璠集有斧季跋自述生年甚詳可攷也晉有孫二十人見朱彝尊所撰晉妻嚴孺人墓志銘 海虞詩苑毛太學綏萬字嘉年號破厓汲古主人孫也前身爲吳昌白椎庵文照禪師汲古孫行最盛惟君知名於時昌熾案士禮居題跋記元英先生集汲古後人毛綏萬校即其人也 同治蘇州府志晉世居迎春門外七星橋少爲諸生性嗜卷軸湖州書舶雲集於門邑中爲之諺曰三百六十行生意不如鬻書於毛氏前後積至八萬四千冊構汲古閣目耕樓以皮之 天祿琳琅毛晉藏宋本最多其有世所罕見而藏諸他氏不能得者則選善手以佳紙墨影鈔之與刊本無異名曰影宋鈔一時好事家

皆爭倣效而宋槧之無存者賴以傳之不朽 吳偉業汲
古閣歌嘉隆以前藏書家天下毘陵與琅琊整齊舊聞汲
放失後來好事知誰及比聞充棟虞山翁里中又得小毛
公按求遺佚懸金購繕寫精能鏤版工繇來斯事推趙宋
歐虞楷法看飛動集賢院印校讎精太清樓本裝潢重損
齋手跋爲披圖蘇氏題觀在直廬館閣百家分四庫巾箱
一幅盡三都卒朝儒臣典制作累代縹緗輸祕閣徐廣雖
編石室書孝徵好竊華林略兩京太學藏經史奉詔重修
賜金紫高齋學士費餐錢故事還如寫黃紙釋典流傳自
洛陽中官經廠護焚香諸州各請名山藏總目難窺內道
場南湖主人爲歎息十年心力恣收拾史家編輯過神堯

律論流通到羅什當時海內多風塵石經馬矢高印陵已
壞書囊縛作袴復驚木冊摧爲薪君家高閣偏無恙主人
留宿傾家釀醉來燒燭夜攤書雙眼摩挲覺神王古人關
書借三館羨君自致五千卷又云獻書輒拜官羨君帶索
躬耕田伏生藏壁遭書禁中郎祕惜矜談進君獲奇書好
示人雞林巨賈爭摹印讀書到死苦不足小學雕蟲置廢
麓君今萬卷盡刊訛那家小兒徒碌碌客來詩酒話生平
家近湖山擁百城不數當年清祕閣亂離蹤跡似雲林
茶餘客話子晉家藏本或云王駙馬以金錢輦之去駙馬
吳三桂之壻也 汲古閣刻版存亾考相傳毛子晉有一
孫性嗜茗飲購得洞庭山碧螺春茶虞山玉蟹泉水患無

美薪因顧四唐人集版而歎曰以此作薪其味當倍佳也
遂按日劈燒之 東湖叢記毛氏於宋元刊本之精者以
宋本元本橢圓式印別之又以甲字印鈐於首其餘藏印
曰毛晉祕篋審定真蹟曰毛氏藏書曰東吳毛氏圖書曰
汲古閣世寶曰子孫永寶曰子孫世昌曰在在處處有神
物護持曰開卷一樂曰筆研精良人生一樂曰旅谿曰弦
歌艸堂曰仲雍故國人家曰汲古主人曰汲古得修綆又
有朱文大方印其文曰趙文敏公書卷末云吾家業儒辛
勤置書以遺子孫其志何如後人不讀將至於鬻類其家
聲不如禽犢若歸他室當念斯言取非其有無甯舍旃天
祿琳琅毛表藏荀子有西河汲古後人叔鄭後裔中吳毛

奏叔收藏書畫記四印愛日精廬藏書志爾雅注疏有西
湖季子之印則展所藏也嚴元照書宣和奉使高麗圖經
後斧季校正補綴處皆以朱文長印鈐縫甚精好其文曰
虞山毛辰手校又案士禮居題跋薩天錫詩集子晉手鈔
版心有篤素居二字元英先生集毛晉跋於讀禮齋愛日
精廬藏書志雲臺編毛晉跋於載得堂詠宋樓藏書志韓
內翰別集毛晉跋於續古草廬此皆汲古遺聞可資參攷
者也

昌歆芟角各有嗜不與世味同酸鹹請觀鍾法十二意論書
亦到梁天監 周榮起研農

居易錄梧溪集七卷細書工緻似鍾太傅終卷如一云是

周研農榮起手錄周江陰老儒常熟毛子晉刻校古書多其刊正其子長源字鄴侯予在淮南時從游門下甚久研農年八十七乃卒今歿纔五六年耳書雜入分信可寶也女禧祐皆工畫禧名尤著 東湖叢記余所藏明周研農手鈔朱性父鐵網珊瑚其珍惜之意甚至卷前有紀錄一篇云性父朱先生遇名山祕玩輒搜弄而手錄之積久成十四卷其字畫之精二百年如新曩藏姚宮詹近世鼎遷流入隱湖爲汲古閣物祕不借人汲古令嗣黼季迺能不靳慨然借我老年目力不勝賈勇繕謄兩年卒業時有誚讓者曰書頗不奇子何做做爲所役乎予謝之曰昌歎芟角其嗜不同人各有懷非爾所知也竊念朱先生勞於結

網予乃逸而坐致盈丈珍奇貧兒暴富石家金谷園王家紫絲步障鬥豔爭高不如此帙多多矣記得少陵句曰詩卷長留天地閒釣竿欲拂珊瑚樹予於此十四卷亦云癸卯十一月三日六十四老人周榮起述 靜志居詩話吳中趙凡夫子婦文淑設色畫本草曲臻其妙江陰周榮公二女淑祐淑禧臨之亦成絕品

新城令君之才子汲古季子之婦翁東澗老人之高足其友則大馮小馮 陸貽典敕先

海虞詩苑陸瑞徵字兆登以歲貢選江甯學博擢知浙之新城縣鼎革不仕所居頤志堂在城西南隅深林曲沼最爲靜外子貽典 又陸貽典字敕先號觀庵自少篤志墳

典師東澗而友鈍吟學問最有原本篤于友誼鈍吟孫岷
自遺詩皆賴君編輯付梓君歿後所著詩亦賴其友張文
鑛之子道淙出諸蠹蝕之餘爲付梓焉人謂食報不遠云
錢謙益唐詩鼓吹序內府鏤版用教童豎里中陸敕先
子子澈子顓偕予從孫次簡校讎刻之 黃廷鑑愛日精
廬藏書志序吾邑藏書絳雲之後尙有汲古毛氏述古錢
氏羽翼之者葉石君馮已蒼陸敕先諸君子互相搜訪有
亾通假故當時數儲藏家莫不以海虞爲稱首 楹書隅
錄影宋精鈔西崑酬唱集二卷毛斧季跋曰外舅覲庵先
生從錢功甫本影寫又覲庵跋曰此書出郡人錢功甫手
鈔余從毛倩斧季印錄者也牧翁絳雲未炬時羽陵祕簡

甲於江南生平慕此獨未得見尙期繕錄一編焚諸殞宮
以申挂劔之義也昌熾案據此二跋則斧季爲覲庵之壻
蓋覲庵與潛在同游東澗之門故兩家遂聯秦晉也又案
平津館鑒藏書籍記元刻千家注杜詩有陸貽典名貽芬
印當是覲庵原名貽芬又愛日精廬藏書志武林舊事覲
庵跋題康熙丁巳小春識于山涇老屋
春水蛟龍卧釣磯儒冠已改姓名非王孫豈是傭書客父子
空山賦采薇 金俊明孝章 子侃亦陶
魏禧朱參軍家傳吳門之隱君子曰金俊明余見之年七
十一矣父曰朱參軍本姓金氏名允元七歲而孤母貧不
能自存有姊適朱氏屬養焉遂冒朱姓更名永昌云入資

授綬甯簿天啟乙丑卒俊明始爲諸生亦姓朱氏名袞後復姓更今名字孝章吳民稱曰孝章先生 汪琬金孝章墓志銘先生既善書平居繕錄經籍祕本以訖交游文彙凡數百種無不裝潢成帙皮置膝鐫惟謹余嘗走訪先生老屋數閒塵埃滿案自起焚香瀹茗稍出其書畫與所錄者娛客而已壽七十有四男四長上震次侃次祐次預蚤卒先生篤於孝友晚而自號耿庵又嘗自書其室額曰孺宜以志之 明詩綜小傳俊明初名袞字九章 靜志居詩話孝章既卒門人私謚貞孝先生平生好錄異書靡閒寒暑仲子侃亦陶繼之矮屋數椽藏書滿櫝皆父子手鈔本也 乾隆蘇州府志孝章長子逖字祖生攻篆隸善騎

射少子侃字亦陶亦工書畫能詩杜門鈔書校讎精審宋元人名集祕本插架甚富 又春草閒房在卧龍街西雙林巷金俊明孝章所構書齋也姜垓詩春水蛟龍卧芳洲薜荔衣經綸人半老兵甲客仍稀濟世名山大編年信史非行藏所鄭重不是戀漁磯 居易錄顧迂客貽所刊范石湖集凡詩三十三卷楚詞古賦一卷金侃亦陶寫校宋版本也亦陶老友孝章之子 帶經堂詩話張宗柎附識云曩嘗購得張蛻庵集卷尾有學圃李崇系跋云是集久無刊本傳世從金亦陶手鈔全本借錄凡五卷 持靜齋書目金侃鈔元人詩秋聲集四卷黃鎮成圭峯集五卷盧琦清江碧嶂集一卷杜本傲軒吟藁一卷胡乘龍揭曼碩

詩集四卷揭傒斯石田集五卷馬祖常所安遺集一卷陳
泰漢泉漫槩五卷曹伯啟金函集一卷元淮肅雝集一卷
鄭允端檜亭槩五卷丁復黃文獻公集五卷黃潛南湖詩
集二卷賁性之鹿皮子集四卷陳樵居竹軒集四卷成廷
珪霞外集十卷馬臻傅與礪詩集八卷傅若金道園學古
錄八卷虞集靜思先生集八卷郭鈺皆其六十歲後手鈔
人品與翰墨俱足珍寶不獨所選詩超然物外也有金侃
仲子老迂等印 平津館鑒藏書籍記寫本琴史有春草
閒房手定印 鐵琴銅劍樓書目張蟻詩集冊首有俊明
明懷不寐道人二朱記 天祿琳琅續編韋蘇州集有有
商孫子芳艸王孫孝章殷孝章四印昌熾案此亦先生印

也改姓爲殷而託於有商孫子可悲也已

喬松嶺上壓霜嚴磊落欹崎如此髯目涉手探歸未足畫又
纔了整書籤 王迺昭

士禮居藏書題跋記汪水雲詩集有迺昭印信樂飢兩圖
章近日見虞山王迺昭手錄詩稿始知迺昭與牧翁同時
而稍後善於書法 昌熾案余藏迺昭手錄沈石田詩亦
士禮居物有虞山王乃昭圖書及樂飢懶髯槐隱諸印藁
翁跋云余偶讀金孝章春草閒房詩集有贈樂飢翁一首
詩云虞山有客王髯交厯落欹崎世無偶孤蹤暫寄童子
師所急初非爲升斗平生苦愛屬奇書見輒相誇得某某
叢函巨軸姑舍諸小品遺編時在口閒來袖錢向書肆目

涉手探凝立久吾儕一一老蠹魚假借搜羅費奔走不知
老至况云疲矻矻鈔藏辰至酉亥更苦心能愛畫鑒別收
藏尤不苟前惟古農竝二王近續阿成堪勁後小鐫自起
旋烹茶興發還傾半壺酒寓樓朝暮總看山挂畫攤書增
二友君不見東鄰老翁富田畝日困催科容瘠黝盡將珍
玩售途人尙恐愆期遭吏毆又不見西家主人書滿屋高
弄不觀供鼠宿子孫持賣不論錢蟬走塵封亂繩束安無
汎愛且密娛心嚴目冷與眾殊觀人取友亦如此意貴立
俗存廉隅只今六十頭如雪斷斷不肯因人熱樂飢有志
詎可遷窮老彌堅厲高潔謂予斯世少完人宜共初終保
清節試看嶺上歲寒松傲雪凌霜可交結予聞交言益凜

然敢不永矢心如鐵古來貧士凡幾何爲爾悠悠數前哲
據此則樂飢之愛書可見其手鈔書籍與孝章先生同樂
此不疲矣因附著於此以見此書出名人手鈔未可以尋
常鈔本論也 又案天祿琳琅續編貢文靖公雲林詩集
有乃昭及乃昭氏兩印又有王氏家藏王印積德王印慎
德三印積德慎德疑是先生後人

滄海橫流自閉門莫城西畔有孤邨篋中隱秀何須祕化作
春風蛺蝶魂

馮舒已蒼
武賈伯

弟班定遠

知十彥淵

知十子

乾隆蘇州府志馮復京字嗣宗御史玘之元孫 海虞詩
苑小傳馮文學舒字已蒼號默庵嗣宗先生長子與弟定
遠有二馮之目爲人悻悻負氣觸忤縣令會君撰懷舊集

成遂坐以訕謗曲殺之士林痛惜焉 又馮班字定遠嗣
宗次子爲人儻蕩悠忽動不諧俗胸有所得輒曼聲長吟
行市井間里中指目爲癡先生怡然安之遂自署曰二癡
著有鈍吟雜錄 蘇州府志馮知十字彥淵復京季子縣
學生明亾大兵至邑格鬪死班子行賢字補之行貞字服
之知十字武字寶伯亦能詩舒孫修字念修從陳瑚游昌
熾案錢謙益題馮子永日草馮子无咎吾故人定遠之子
也易无咎者善補過也无咎當爲補之別號又按海虞詩
苑小傳行貞號白庵武號簡緣毛潛在館甥讀書汲古閣
歷十餘年祕册異本多所窺覽著有書法正傳二卷遙擲
橐十卷 愛日精廬藏書志汗簡七卷馮已蒼手鈔後有

跋云崇禎乙酉避兵莫城西之洋蕩村大海橫流人情鼎
沸此鄉猶幸無恙屋小炎蒸無書可讀架上偶攜此本發
興書之二十日而畢猶憶予家有舊鈔張燕公集卷末識
云吳元年南濠老人伍德手錄此時何時嘯歌不廢他年
安知不留此洋蕩老人本邪 何焯文心雕龍跋已蒼記
云謝耳伯常借功甫本於牧齋宗伯宗伯仍祕隱秀一篇
已蒼以天啓丁卯從宗伯借得因乞友人謝行甫錄之其
意秀一篇恐遂多傳於世聊自錄之則二公之用心頗近
於隘後之君子不可不以爲戒隱秀篇元至正乙未刻於
嘉禾者卽闕一葉錢功甫得阮華山宋槧本後歸虞山而
傳錄於外甚少 莫氏宋元本經眼錄鹽鐵論有馮武題

識云先太史藏書萬卷子孫不能讀且不知愛惜卽宋元
精版盡化爲蝴蝶飛去昌熾案先太史謂復京則馮氏藏
書不自己蒼始矣馮氏藏書有長樂印有上黨長方印有
馮氏藏書方印已蒼藏印曰空居閣曰上黨大馮收藏圖
書記寶伯藏印曰簡緣子已蒼自號詡道人又號孱守居
士讀書敏求記吾友馮已蒼別號癸巳老人藏書率多異
本吾邑之宿素也黃丕烈校云己巳冬見馮鈔汗簡上有
癸巳人三字印章知老字衍文原本無之也周星詒校云
癸巳人蓋本于五代楊凝式之自稱也詒生年與兩君同
亦刻一小印恆以識藏書祕冊見寅慕之後尋得松雪翁
自稱甲寅人因亦以爲號

繞屋梅花壓萬籤道書竺典社中添南陽閨秀高陽婦紙尾

猩紅小印鈐

許元溥孟宏 許心展丹臣

康熙蘇州府志許元溥字孟宏父自昌中書舍人以篤行
稱構梅花墅聚書連屋元溥生而沈靜日出其書徧觀之
於經藝罔不淹通喜購書自號千卷生崇禎庚午舉於鄉
乾隆府志梅花墅者甫里許自昌所構今爲海藏菴陳
繼儒詩青山解綬修僮約紅袖焚香捧道書徐沂詩藏來
竺典添香誦出世因多樂未除 梨洲思舊錄孟宏長洲
人余與劉伯宗及孟宏約爲鈔書社 又南雷集感舊詩
鈔書結社自劉城余與金閫許孟宏好事於今仍舊否煙
雲過眼亦傷情 昌熾案士禮居題跋記所載劉子新論

甫里先生文集蛻庵集皆許心屨藏蕘翁述周香巖云丹
臣爲葉九來塔故藏書具有淵源甫里集中丹臣題記有
先中翰云云中翰當指自昌愛日精廬藏書志揭文安集
王蓮涇跋壬辰購書於甫里之高陽氏丹臣許兄慨然示
余云云孟宏及見梨洲而蓮涇在康雍之交丹臣與之同
時必在孟宏之後矣攷蘇州府志藝文類孟宏長子王儼
字孝酌著有鞠園雜志聞樾軒文集滄浪亭集代萱集子
懷集嶺怡草蔗菴詩草次子澹宇箕屋著有辛苦吟一卷
豔詩一卷從子定升著有香谷林文集清蔭閣詩集惟心
辰無攷劉子新論後轉入硤石蔣氏東湖叢鈔云有歸高
陽葉氏印卷末有楞印南陽閨秀二朱記按此卽九來之

女丹臣之婦也

客來請席將何鄉不出縱橫散帙中尙有西臺前進士題詩
慘澹表幽宮

包擘芳子柳

高承埏寓公

玉劔尊聞包擘芳字子柳嘉興人喜書聞有異本卽僻巷
環堵必徒步相訪得之則分命左右傳寫手自摘錄垂丙
夜不休客至散帙縱橫几案閒幾無所布席而了不爲異
錢謙益嘉興高氏家傳宏光元年四月工部虞衡司主
事高承埏爲其父屯田司郎中道素伏闕訟冤詔復原官
越十四年虞衡子佑鉅乞爲家傳屯田君諱斗光字明水
改名道素字玄期萬曆己未進士承埏字寓公崇禎庚辰
進士知遷安寶坻涇三縣宏光初量移工部虞衡司主事

昌熾案佑鈺字念祖與其弟佑鈞並能文見嘉興府志
朱彝尊前進士高公墓表公一字澤外以虞衡歸誓墓不
出隱居竹林村窩著有稽古堂集 又吾妻鏡跋康熙甲
辰獲覩於郭東高氏之稽古堂 又靜志居詩話先生家
藏書八十櫃與項氏萬卷樓爭富雖干戈俶擾不輟吟哦
其病中述志云唯將前進士慘澹表孤墳讀者比之澤畔
行吟西臺痛哭 朱辰應高工部傳公亦好聚書多至數
萬卷寢處其中校勘不倦時復卒卷掩抑曰先人有知魂
魄猶應眷此也

餅師竈妾呼名字宿老貧酸丐唾餘一語先生差不惡不知
棋局但鈔胥

陳繼儒仲醇

明史陳繼儒字仲醇號眉公松江華亭人爲諸生與董其
昌齊名年甫二十乃取儒衣冠焚之隱居崑山之陽後築
室東佘山杜門管進年八十二卒 列朝詩傳仲醇能延
招吳越閒窮儒老宿使之尋章摘句刺取其瑣言僻事嘗
萃成書寡聞者購爲枕中之祕 靜志居詩話仲醇以處
士虛聲傾動朝野市骨董者如赴畢良史推場品書畫者
必求張懷瓘估價時無英雄互相矜飾甚至吳綾越布皆
被其名竈妾餅師爭呼其字未免名不副實焉 眉公尙
白齋讀書十六觀余頗藏異冊每欣然指謂子弟云吾讀
未見書如得良友見已讀書如逢故人 又太平清話余
得古書校過付鈔鈔後復校校過付刻刻後復校校過卽

印印後復校然魯魚帝虎百有三夫眼眼相對尙然况以耳傳耳其是非毀譽甯有真乎昌熾案眉公寶顏堂秘笈改竄刪節真有不刻之歎未能副其言也惟其論藏書云鈔本書如古帖不必全帙皆是斷珪殘璧又巖棲幽事中有一言云著棋不若鈔書皆爲名論其所居曰寶顏堂者以得顏魯公書朱巨川告身故以名其堂也雲間城外又有兩精舍一顏仙廬一來儀堂見黎州思舊錄又有婉變草堂仲醇嘗題詩云長者爲營栽竹地中年方慙住山心見巖棲幽事自序其所藏書畫嘗用一印曰一腐儒

張燈披衣起達旦寫書目光巖電爛子綦子桐世不知聞日

者言爲三歎

顧紳開林

顧道際

彭士望長洲舊文學顧君生壙誌君名紳字開林東吳之務實君子也嘗以文章受知於提學御史倪公元珙甲申之變謝諸生性獨好書甚於飢渴飲食其有裨於身心家國天下之務足備一代之文獻者耳目所及輒展轉窮搜之必購得之爲快或書裒重及未版行而隱祕者求之益力得之則狂喜神色飛動或力有所不能得則手自鈔寫窮日夜可盡百十紙夜嘗不寐寐亦止盡數刻而張燈披衣往往達旦手不釋卷不停鈔自以爲愉快極雖老至不知也凡鈔閱校讎精審不訛一字稍涉疑義則盡記之舉其辭問晰乃已尤嗜古金石文蟲螭焚餘亦所珍惜窮力

購之食脫粟衣懸鶉不顧也嘗有日者言君之子命當奇
貴君愀然曰吾生平無大罪過吾子何荼毒至此知戚傳
以爲笑君曰君未讀徐無鬼篇乎九方歎相馬得而相子
綦之子相也爲失抑知世之所祥神人之所爲大不祥者
乎君生萬曆乙卯今庚申之間得三百七十甲子子男六
人長執桓次國樑文煥俱諸生執禮執中執圭鄉居黃埭
河濱橋因自稱河濱漁人予庚申秋在吳門君從魏叔子
朱臥庵所見予文卽盡鈔藏弄之喜而歎曰先生此集道
德經濟非文章也今盡爲予有也矣 錢謙益顧君升墓
志銘君諱世峻字君升原名延祐世家長洲埭川下堡村
祖道隆爲名士藏書萬餘卷與祝京兆文待詔父子爲文

字交昌熾案道隆與開林同姓顧氏同居埭川疑一家

吳下藏書鸞嘯齋柳絲紫地蘇當階東林喬木嗟何在悵望
師門一愴懷 陳煌圖鴻文 陳帆際遠

楊无咎陳典籍家傳君諱煌圖字鴻文生萬曆戊午仲冬
有冬蘭之瑞乳名蘭蓀崇禎壬午副榜官翰林院典籍兼
待詔事未及半載南都失君痛不欲生顧念兩親老遂歸
隱於西湖田舍北山草堂 海虞詩苑是時馬素修楊維
斗二先生爲江左人望公兩游其門稱入室弟子 又陳
帆字際遠號南浦詩宗晚唐畫宗梅道人字宗柳誠懸
昌熾案煌圖後改名鴻子逢午字方中逢午子祖范卽見
復先生也南浦亦工詩牧翁有學集有題南浦曉窗詩云

陳子家貧而學富齒壯而才老 愛日精廬藏書志汗簡
七卷孫本芝鈔本陳氏跋曰崇禎辛巳余年二十有四讀
書於吳門維斗師之古柏軒秋日同張孟恭至城隍廟古
書鋪見此孟恭解金購歸後馮已蒼鈔得余於庚寅從已
蒼借鈔質之徽友葉姓今春初知本翁有此藏本仍寫一
冊存之王成清明日太邱陳鴻記 又李商隱詩集三卷
跋曰丙戌正月借孫孝若北宋版對正時家南浦影鈔全
部三卷 又溫庭筠集未有南浦題識云假錢遵王鈔宋
本重勘 鐵琴銅劍樓書目嘯堂集古錄鄉先輩陳鴻文
先生手寫先生工篆隸書 又鹿門集陳鴻文氏傳錄絳
雲本版心有鸞嘯齋藏本五字卷首有古吳陳鴻文太邱

氏書記朱印 陸階昭平呈鴻文詩柳綫縈書帶榆錢壓

蘇衣邨童荷鋤去稚子抱書歸

獨從地老天荒後收拾遺文比碎瓊海內羽陵錢蒙叟一瓶

猶到射襄城

蔣之翹楚碑 蔣石林

嘉興府志秀水蔣之翹字楚樨家貧好藏書明末避盜村
居收羅名人遺集數十種選有甲申前後集又嘗重纂晉
書校注昌黎河東集 明詩綜小傳蔣之翹秀水布衣甲
申後隱於市 靜志居詩話楚樨居射襄城楚詞晉書韓
柳文集鏤版以行又嘗輯樵李詩乘四十卷晚年無子書
籍散佚無餘詩乘亦亾可歎也 甯宋樓藏書志九靈山
房集有跋曰我里蔣之翹隱廛市閒有藏書之癖虞山錢

宗伯編國朝詩集嘗就其家借書此卷首甲乙題字宗伯
蹟也壬戌上元前二日鉏菜翁記昌熾案鉏菜翁曹倦圃
號也蔣布衣所著天啓宮詞倦圃刻入學海類編又案天
祿琳琅元刻本宋吳儆竹洲集有樵李蔣石林藏書印記
楹書隅錄宋本履齋示兒編有樵李蔣石林藏書畫印蔣
氏家藏文印記石林無考附此

桂井牙籤比鄴侯大參門第白檀留荒亭灑盡興山淚碧血
書囊弔髑髏 陸寶敬身 陸字燦春明

全祖望中條先生墓表先生諱寶字敬身一字青霞學者
稱為中條先生鄞之白檀里人也陸氏為甬上四姓之一
家在細湖之西畔門施棨戟者相望鄞人各以其房別之

其曰給諫房則以先生大參之官著而先生所居有雙桂
皆藤本先生使工人環而結之其狀如井絡故鄞人別稱
曰桂井陸氏先生之初集曰霜鏡次集曰辟塵曰悟香惟
霜鏡行於時悟香當收步之後國事君讎頌言不諱故世
莫得見近者先生後人喪失其家青檀故物遂無一草一
木之得保於是棗梨之屬皆出而予得見之嗚呼是亦得
井之藏也矣先生藏書最富多善本吾鄉之以藏書名者
天一閣范氏次之四香居陳氏又其次則先生南軒之書
三十年來亦四散予從飄零之後撫拾之尙得其宋槧開
慶寶慶四明二志及草廬春秋纂言皆世閒所絕無也
又陸披雲先生阡表先生諱宇燦字春明別署為披雲巖

庵副使之第五弟也丙戌後棄諸生與喪職之徒游荒亭
木末時聞野哭性嗜異書晚年家既貧不能具寫官乃手
鈔之瀕病不倦從子官山左令其訪東萊趙隱君士哲遺
書垂歿尙以其書未至爲恨箸觀日堂集八卷昌熾案驚
庵副使名宇燭字周明四明六狂生之一 又明故兵部
右侍郎兼都察院右僉都御史王公墓碑公諱翊字完勳
慈溪人國變結寨於大蘭以起事爲大兵所執梟示甯城
西關門鄞之故觀察陸公宇燭故都督江公漢以奇計竊
得藏之陸氏書櫃中襲之以錦其家人亦弗之知也康熙
癸卯觀察以海上事牽連赴逮其家被籍有司見書櫃中
故紙斷爛陳因棄之而去觀察之女屏當書櫃得一錦函

發之則人頭也觀察之弟宇燦哭曰此侍郎之首也而得
不爲有司所錄其天也夫

五陵少年誰見憐偏於墨汁有因緣作詩我亦虞山志忍使

兩生竟翳然 譚應明公亮 應徵公度

錢謙益跋真誥此鈔依金陵焦氏本繕寫里中有二譚生
長應明字公亮伉爽傲物攀附海內鉅公名士好購書多
鈔本客至鄭重出示沾沾自喜次應徵字公度此本則公
度所藏也公度紈袴兒郎尤爲里中兒賤簡不知其於汗
簡墨汁有少因緣如是余悲兩生身沈家亾有名字翳然
之感故錄而存之昌熾案張大復梅花草堂筆談屢言譚
公亮面冷頭方世人競拾其闊達高華之好以相訾詬又

云譚公亮一片熱腸金盡無色皎皎入文亦復作羊叔子
之鶴毛羽瑋璋而已八文者其家歌童也有譚家文一則
云文真如一樹梨花溶溶夜月文筆如楚畹數莖香韻無
非大國文昭如天半朱霞疏梅掩映文簫如出水芙蓉不
妨秋老八文名字可攷者僅此天祿琳琅明刻南唐書有
譚應微印公度公度氏三朱記續編晞髮集有臣徵公度
氏二朱記皆其家書也微字當為徵之誤余按采藏書家
故實於姓字將湮者雖記載寥寥亦必表而出之猶東澗
翁意也

築屋西陳盡累甍扞擻何似石倉堅荒年乞得監河粟猶是
江南舊俸錢 江南王別駕


紫桃軒雜綴余昔在西陳有王貢士者遇儉歲知余好書
數以書來易粟云其曾祖作江南別駕歷官所蓄盡買書
築甍屋藏之云書不在世業例子孫才者就讀今以族眾
頗多不類者每每竊出甍屋亦就圯矣貢士所得粟不敢
私必與族均沾余益賢其人而樂與粟然以歸途遠非道
里所便止易二十一史凡三竹篋以回中多善本可與新
者相校

黃金布地花兩天寶幢瓔珞結爐煙語言文字歸何用開士
和南供佛前 謝兆申耳伯

明詩綜小傳謝兆申字耳伯邵武人 靜志居詩話晉江
黃明立序耳伯集稱其喜交異人購異書撫異聞自墳典

邱索經緯流略稗官瑣語靡不甄錄交游既廣橐中裝半以佞佛半以市書有三十乘留僧舍已散軼予嘗入閩購其手鈔張伯雨詩與世所傳者迥別惜乎三十乘者悉蕩爲煙塵矣 筆精予友邵武謝兆申好書盡罄家資而買墳籍兀坐一室四面皆書僅容一身予與謝君極稱臭味交謝君藏蓄幾盈五六萬卷又多祕冊合八郡一州未有能勝之者 池北偶談蘆浦筆記十卷乃萬曆中綏安謝兆申所鈔丹陽賀氏藏本 而宋樓藏書志蘆浦筆記十卷有跋云是書藏丹陽賀進士煊家借錄以備稗官一種萬曆三十有九年辛亥十一月綏安大弋山樵謝兆申寓清涼寺之唯心庵校 愛日精廬藏書志水經注四十卷

馮已蒼手校紅筆增者謝耳伯所見宋本也 又文心雕龍南都有謝耳伯校本從牧翁所得本而附以諸家之是正者也聞耳伯借之牧翁時祕隱秀一篇



癸書三

十一

